



Synfocity = 952

mail us at : mzsynfo@gmail.com; mizoramsynod@gmail.com - Phone - 2314648

August 29, 2024

❑ **PBS Farewell & Dedication wawi 58-na**

August 22, 2024 (Ningani) chawnu dar 1 khan Pi Zaii Hall, Synod Conference Centre, Mission Vengah Presbyterian Bible School (PBS) chuan Batch 58-na Farewell and Dedication Programme an hmang.

Programme hi Rev. Lalrinsanga, Principal-in a kaihrui a, Rev. R. Vanlalngbaka, Synod Moderator-in zir chhuakte hnenah Certificate hlanin thuchah a sawi a, Moderator chuan thiamna leh kum lamah pawh in ang lo tak tak kal khawm nimahsela an hma hun zelah Pathian leh kohhran tana mi t̄angkai leh chhawr tlak ni zel turin a chah a ni. Zirlai exam-a ti thate hnenah Rev. P.C. Pachhunga, Finance Officer-in lawmman a sem a, class kai kimte hnenah Rev. H. Laltlanhang, Statistician-in lawmman a sem a, Pu C. Awithanga Award chu Upa Vanlalsawma Siakeng, Synod Secretary (Jr.)-in a hlan bawk.

PBS-ah hian a din tirh aṅging tun thleng hian zirlai 2,760 an awm tawh a, chung zinga 2,305 chuan th̄a takin an pass a. Tuna batch 58-naah hian zirlai 37 awmin zirlai 34-in th̄a takin an pass a, exam lo 3 an awm.

Exam-a ti th̄a zual pathumte hnenah lawmman ₹ 1000/-, ₹ 700/-, ₹ 500/- leh lawmpuina thuziak PBS Committee hminga pek a ni a, chungte chu:-

1-na - Vanlalngbaka s/o Vanramlawma, North Khawlek Kohhran

2-na - Lalsiamkima s/o S. Mangkhuma, N.E. Tlangnuam Kohhran

3-na - C. Lalramchhuana s/o C. Lalbiaknunga, Bungkawng Vengthar Kohhran

Batch 58-na zirlai zingah hian class kai kim mi paruk hnenah lawmman ₹ 500/- th̄euh pek a ni.

Kum 2014 aṅging Christian Theology subject leh Kohhran Inrelbawlina leh PCI Danpui subject-a ti th̄a berte hnenah Pu C. Awithanga Award hlan th̄in a ni a. Batch 58-naah hian Kristian Theology subject-ah C. Lalramchhuana'n mark 84% hmuin Award a dawng a, Kohhran Inrelbawlina & PCI Danpui subject-ah Vanlalpara Ralte-in mark 90% hmuin Award hi a dawng bawk. Award hian ₹ 1000/- a keng tel a ni.

❑ **Residential Choir Conductors' Training**

August 27-30, 2024 chhung khan Pi Zaii Hall, Synod Conference Centre-ah Synod Worship Department buatsaihin Residential Choir Conductors' Training neih a ni a. He training-ah hian Bial/Kohhran hrang hrang aṅging Conductor 55 an kal khawm a. Synod Worship Department hian Residential Choir Conductors' Training hi kum tin a buatsaih th̄in a, kumin hi Conductors' Training neih wawi 28-na a ni.

August 27 (Thawhlehi) zan dar 6:30-ah programme hlanna inkhawm neih a ni a. Pu Lalchhungliana, Co-ordinator, Worship Department-in a kaihrui a, Pu H. Lalrinmawia, Senior Instructor-in introduction a neih hnuah Upa Vanlalsawma Siakeng, Synod Secretary (Jr)-in Pathian hnenah programme a hlan a, programme hlanna neih zawh hian training chhuzawm nghal a ni.

August 30 (Zirtawpni) zan dar 6:30-ah training kharna inkhawm neih a ni ang a, Rev. P.B. Mankima, Synod Secretary (Sr)-in inkhawm kaihruiin Pu Lalchhungliana, Coordinator-in training report a pe ang a. Rev. R. Vanlalngbaka, Synod Moderator-in training chhuakte hnenah Certificate hlanin thuchah a sawi nghal bawk ang.

❑ **Social Front**

August 23, 2024 (Zirtawpni) zan khan Bawngkawng Bethel Kohhran-ah Synod Social Front programme, 'Tuihna, Ram ngaw leh Nungcha humhalh' campaign neih a ni a, he hunah hian campaigner Dr. Lalbiakmawia Ngente, Bungkawng a kal. Ani hi Synod Social Front Tuihna, Ram ngaw leh nungcha humhalh core group member a ni.

❑ **Ramthar Ni**

August 31 (Inrinni) hi Ramthar Ni a ni a, Mizorama Presbyterian Kohhran rawn dintu Rev. David Evan Jones (Zosaphluia) Mizorama rawngbawl tura a lo thlen ni a nih vangin Mizoram Presbyterian Kohhran tan ni pawimawh bik a ni. Kum 1972 Mizoram Synod Inkhawmpui chuan, Synod Ramthar Board-in, 'August 31, Pu Zosaphluia Mizorama a lo thlen ni hi Synod Ramthar Ni atan hman ni se', tia a rawtna chu pawmin kum 1973 aţang khan August 31 chu Ramthar Ni atan hman ţan a lo ni ta a ni.

Mizoram Presbyterian Kohhran chuan kumin Ramthar Ni pual hian ţum khat inkhawm atan programme a siam a, thupui inang tlang 'Chung lam aţanga chhuakin min rawn tlawh' tih chu zir ho a ni ang.

Ramthar Ni denchhen hian Synod Mission Board-a thawktute leh campaigner-te hetiang hian Ramthar Campaign-in an chhuak ang:

1. Venghlu Kohhran - Rev. R. Lalmingsanga, Secretary, Synod Mission Board
2. Ruantlang Kohhran - Upa Lalţahluna Ralte, Coordinator leh Upa K. Lalţhakima, ITI Veng
3. Vauzau Bial - Pu B. Lalringliana, Mission Promoter; Pu Lallawmnakima Hmar, Circulation Manager, Ramthar Chanchinbu; Upa Lalramliana, BEC member; Upa C. Lalmalsawma, BEC member
4. Bukpui Bethel Kohhran - Pu K. Laldawngliana, Mission Promoter leh Pu. T.C. Lalruatfela, Synod Office
5. Centenary Kohhran - Pu K. Lallianzuala, Supervisor of Schools
6. Hmunţha Kohhran - Rev. F. Lalrinnunga, BEC member

❑ **PCI buatsaih Consultation**

August 20-22, 2024 chung khan PCI General Assembly Hall, Shillong-ah P.C.I. General Assembly chuan Climate Change, Eco Justice & Restoration chungchangah consultation a buatsaih a. He Consultation-ah hian Mizoram Synod aiawhin - Rev. Dr. Lalrokhuma Hmar, ATC, Rev. Zaithanmawia Pachuau, MTC, Upa H. Lalmingmawia, Synod Office, Upa Lalnunsiana Khalthang, Chhinga Veng, leh Upa Samuel Laldingliana, Electric Veng te an kal. Consultation-a thu sawi ho leh ngaihtuahte hi Assembly Committee on Peace & Justice Committee-in a la thlir ho leh dawn a ni.

❑ **Prison Ministry**

August 23-25, 2024 chung khan District Jail, Aizawlah Crusade hlawhtling taka hman a ni a. Crusade-ah hian, Rev. Dr. Malsawmzoliana, ATC chu Speaker a ni. Crusade-ah hian One in Christ bakah NI. Thelma Lalmingthangi, NI Lalawmpuii leh NI. Zomuansangi Pachuau te'n zaia rawngbawlina an nei bawk a. Crusade chung hian taksa leh thlarauva damna chang thar te awmin, zai boruak a tla tha thin hle a ni.

SMB Missionary, Pi Mimi Lalthansangi'n a lehkhabu ziah, 'Vut aiah Pangpar Thi' copy 2, District Jail Library tana a pek chu Prison Ministry Director, Rev. Lalmuchhuaka'n a hlan a. Speaker Rev. Dr. Malsawmzoliana Bible chhiar chhuakte hnenah certificate a hlan bawk a ni.

Crusade neih phalna petu, Prison Dept hotute chungah leh ţawngţaipuitute zawng zawng chungah Synod Prison Ministry chuan Pathian hmingin lawmthu a sawi a ni.

❑ **KTP**

♦ August 24 & 25, 2024 khan Thenzawl Field Veng Bial KTP Leadership Training hmanpuiin Central KTP committee member-te, NI. F. Lallianzuali, Pu K. Vanlalremruata leh Pu Lalruatpuia te an kal.

♦ August 25, 2024 (Pathianni) zan khan Tanhril MZU Kohhran Biak Inah MZU Zirlai Pual Inkhawm hmanpuiin Central KTP Committee Member leh Synod Zaipawl te an kal a. He hun hi Tanhril MZU Kohhranin KTP member-te leh MZU-a zirlai awmte tana a ruahman a ni a. Member leh kohhran mipui ţahnem tak an inkhawm a, inkhawm banah fellowship hlimawm tak hman a ni bawk.

♦ August 26, 2024 (Thawhtanni) zan khan Khawzawl Vengsang Branch Rising Day leh Evangelical night hmanpuiin Central KTP hruaitute - T.Upa T.C. Lalremsiana leh Pu Rochhingpuia te an kal.

❑ **Trust**

♦ August 26-28, 2024 chung khan Sialhawk leh Vanzau Pastor Quarters renovate tur en felin Pu Lalhriatrenga, J.E a kal.

♦ August 29-31, 2024 chung hian Guwahati leh Shillong-ah Synod House sak en turin Rev. P.C. Pachhunga, Finance Officer leh Upa Thangliankhuma, A.E te an kal.

❑ **MSSU**

August 31, 2024 (Inrinni) hian Ṭawipui North-II Bialah Sunday School zirtirtu training neihpui turin trainer-te, Upa K. Zoremsanga, Upa S. Kapzathanga leh T.Upa B. Malsawmtluanga te an kal ang.

❑ **Synod Mission Board**

◆ **Nepal Mission Field**

August 24, 2024 (Inrinni) khan belhtu thar pakhat a awm.

◆ **Jharkhand Mission Field**

August 25, 2024 (Pathianni) khan belhtu thar 25 an awm.

◆ **Calcutta Mission Field**

August 25, 2024 (Pathianni) khan belhtu thar 29 an awm a, thawḥṭanni aṭanga Pathianni thlengin belhtu thar 47 an awm a ni.

◆ **Odisha Mission Field**

August 25, 2024 (Pahtianni) khan belhtu thar pahnih an awm.

◆ **Arunachal & Assam Mission Field (West)**

August 25, 2024 (Pathianni) khan belhtu thar pali an awm.

◆ **Lucknow Mission Field**

August 25, 2024 (Pathianni) khan belhtu thar pahnih an awm.

◆ **Karbi Anglong Mission Field**

August 25, 2024 (Pathianni) khan belhtu thar pali an awm.

◆ **Patna Mission Field**

August 25, 2024 (Pathianni) khan belhtu thar pakhat a awm.

◆ **Tripura Mission Field**

August 24, 2024 (Inrinni) khan belhtu thar paruk an awm a, ni 25 (Pathianni) khan belhtu thar 17 an awm bawk.

◆ **Biak In thar hawng**

August 26, 2024 (Thawḥṭanni) khan Jaruwadih kohhran Biak In thar chu Rev. Dr. C. Lalthanzara, Field Secretary-in a hawng. Biak In thar hawn inkhawm hi Pu Lalthanpuia, Jaruwadih Kohhran Vice Chairman-in kaihruaiin Pathian hnenah Biak In thar hlanna hun a hmang a. Nl. Lalpianmawii, Evangelist, Jaruwadih Kohhranin Biak In sak dan report a pe a, kohhran zaipawl an zai a, Bialtu Pastor, Rev. Lalruatfela Khiangte-in Pathian thuchah a sawi a ni.

Biak In thar hi a dung feet 75 leh avang feet 33 a zau a ni a. Biak In a lo din theih nan hian Pu Piangthanga (L) te chungkua, Chanmari, Aizawl te chuan Biak In hmun lei nan leh Biak In sak nan cheng nuai 30 an thawh a ni.

Biak In thar hawn inkhawmah hian Field chhunga Pastor, Pro. Pastor leh thawktu missionary-te an kal ṭha hle a, Biak In thar lawm nan ruai an kil ho bawk. Jaruwadih Kohhran hi bial station niin tun dinhmunah member 68 an awm mek a ni.

❑ **Office Kai hun tidanglam**

Synod Executive Committee vawi 281:44 of dt. 12-14.11.2019-in a rel angin Synod Office leh Synod hnuai Dept hrang hrangte Office kai hun tidanglam a ni a, September 2024 aṭanga February 2025 chhung hian Office kai hun chu dar 9:30 am - 4:00 pm a ni ang.

❑ **Synod Relief Fund**

Tun hnaia harsatna hrang hrang tawkte hnenah Synod Relief Fund aṭangin hetiang hian chhawmdawlina pek a ni.

S.No	Khua/Veng	Pek chhan	Chhungkaw zat	Pek zat
1.	Selam	Khawsak harsa leh Damlo	4	₹ 40,000/-
1.	Ramhlun North	Damlo	3	₹ 30,000/-
2.	Tuikual North	Damlo	1	₹ 10,000/-
3.	Sihphir Vengthar	Leimin tuar	1	₹ 8,000/-
			Belh khawm	₹ 88,000/-

- ❑ **FM Zoawi - Aizawl & Lunglei : Hruaina Eng Radio Programme**
August 30, 2024 (Zirtawpni) @ 7:30 p.m. :
Solo : Lalmuankimi - Ka inngahna hmun
Zaipawl : Mizoram Synod Choir - Ka lawm e Lalpa
Thusawi : Rev. R.C. Lalngakliana - Thalaite leh Tunlai
Solo : Nancy Zothanmawii - Ka lungawina
Zaipawl : Durtlang Bial Zaipawl - Nitinin thlemna
- ❑ **Su Samachar Prasaran Programme :**
September 01, 2024 (Pathianni) 5:30 pm. :
Group/Choir/Solo : The Leprosy Mission Choir - Ham Soup Te He
Group/Choir/Solo : Sheila Lepcha - Anugrahkari
Sermon : Rev. P.C. Rohlira
Group/Choir/Solo : Sihphir Vengthar Masihi Sangati - Na to bal se
Group/Choir/Solo : H.Vanlalringa - He Mere Man
- ❑ **Hruaina Eng TV Programme**
29.8.2024 (Ningani) 8:30 pm : Thupui zir bing
30.8.2024 (Zirtawpni) 5:00 pm : Kristian Naupang Pual
31.8.2024 (Inrinni) 5:30 pm : Puitling Sunday School Zirlai
01.9.2024 (Pathianni) 8:00 am : Weekly round up
5:30 pm : Su Samachar Prasaran
02.9.2024 (Thawhtanni) 8:30 pm : Hruaina Eng Luang chhuak
- ❑ **Moderator leh Executive Secretary-te Programme:**
Rev. R. Vanlalnghaka : Moderator
Aug. 24-25, 2024 Kohhran tlawh-Vairengte Chhim Veng Bial
Rev. C. Zoramawia : Senior Executive Secretary
Sept. 1-8, 2024 Zin lovin Office-ah a awm ang
Rev. V.L. Luaia Hranleh : Executive Secretary
Aug. 29-31, 2024 AISSA Meeting, Nagpur
Rev. Dr. K. Lallawmzuala : Executive Secretary
Aug. 29-Sept. 2, 2024 Interserve Annual General Meeting, Delhi
**Sept. 2, 2024-a Synod Finance Managing Committee-ah Moderator leh Executive Secretary-te an
thu ang.**

SYNOD REVIVAL HRIATTIRNA

September 3-7, 2024 chhung hian Synod Revival Camping Center, Neihbawiah a duh apiang tan Camp-
ing buatsaih a ni dawn a. Speaker tur chu Pu C. Lallianthanga, Agape Gospel Rhema Team a ni ang.
Camping Fee mi pakhat tan ` 100/- a ni a, Mutbu bakah Bible, Hlabu, Pen, Note Bu ken tur a ni.
Ruihtheih thil ken luh phal a ni lo a. Mobile Phone pawh ken luh phal a ni lo. Thawhlehniah lutin
Inrinniah chhuah leh tur a ni ang. Camp neihna hmun Neihbawiah chhun dar 12 - tlai dar 4 inkarah
Registration tih fel vek tur a ni a, rokhawlhna lian tak nei an nih loh chuan tlai dar 4 hnu lamah in Register
theih a ni lo ang. Ei leh in chu Synod-in a tum vek dawn a ni.

DR. FRASER'S CLINIC HRIATTIRNA

Dr. Fraser's Clinic, Mission Veng-ah September 2, 2024 atangin Working hours chhungin Medical
Officer engtik lai pawhin rawn theih a ni ang.

